


Carlavé da Campartögn 2017



Par tradisiun la panicchia ad Carlavé i vëgghi i la févu par la pòura gént par degghi quaicòs da mutti sòtt i dént, e, dopo settant'un agn fuma ancò paré. Dèss chiamumma piü al trifuli cà par cà ma i numma vendi bijeit anca al diau via da là, par continué a fé al Carlavé cun i giòigh, al bal e... cun ciü ch'al gh'è! E nu gh'è chi cattu mà an bijettin ad malavoja, cumé se fussa na tassa da paghé... pöi in cui lì chi rivu cun na brenta paré par tò la panicchia: mia cun an pittu sigilin!.. Ma i Raviccioin is nu fan sè di tanajin e par tüch i gh'an panicchia e vin, e cun ciü ch'al resta, al di dopo la festa, i vardu da fé an quaicòs ad bun par al paisè par ogni buntempun!



Par fé la panicchia da Campartögn da tanti robbi as g'ha busögn ma ag uenta mutti anca al muciarij ch'as sentu tüt l'an ant i ustarij.



Dinti al caudéri va tanta àva 'd la funtana, cumè culla ca la gniva giü dal térs pian ant na cà giü al Quari, sora smàna: par an rubinèt duvert in fach la pulisia par tüt l'an!

Par fé lauré ben al cöc par primma robba as fa an bel föc, ma mia tacà la ghiësa cumè a la Rusa, òia-mí! ...chi eru péina pittürala da dói dí!




Pöi as prepara al brö cumé a cà, e al gh'ha da cösi na giornà par fé gni mursina la carn dal nost maslé (cul ca l'è sempri chiapà, ch'a l'è sempri dré a lauré, ca l'è sempri chiel a fesi al cü!...) Anca a sant'Anna l'è piangiü, e a purté la Madonna an prucissiu l'è mandà al pòuru garzun!



Par degghi al prufümm al brö cun lauro e rusmarin as fa an massö che par al nas l'è na poesía... e dèss sun visami cun malincunía da culla vëgghia a la Piana che, al dop disnà, la volp l'è mordulla an cà!.. Fevva nùni marvíji: dal rest l'è na frasiun che, daré al San Roc, l'è a l'abandun, e se la volp la va a fesi an gir par da lí dèss al riva anca l'òrs a fesi al ní (sempri che la fumbra ga vagga dré e ca ga fagga da manghié!)



Ma nevvu mia töl i ciudin a la Piana parché là i trovi mia pietà cristiana!... An cruàch rabiós l'è pèstà sòtt i péi i sachéit da doe fumbre da qui: smija gnanca véi, l'è na robba ch'as po' mia sentí...



A la séi dal sabba as töl sù al bují ma nu gh'è téint chi van tölù a l'ustaria: i taccu a rüsé e is fermu mia se t'at mütti ant al mès nu gh'è anca par tí! ...Antant l'è gnü noch an piassa: as fa marena, as ghigna as ganassa, e as vugh na steila sù al Belvedere antè ca gh'è na baita mal rangià... ...al gh'è gnanca ancò al cantiere e par spuante na quai bescia affamà i pagu la bullëtta par la ghil e 'l tassùn al gira bel tranquil!



L'almenga bun'ora as rüga al lard ant la casaróla, par ch'al tacca mia giü ag uenta fé tansiun... ...cumé a gni giü cun la Madonna d'an sal Calun ag uenta vardé da mia fé la curgnòla! Vün l'era mutüssi in boghia al martel par batti i cügn 'd la bàrella par la prucissiu e pöi l'è na a scarüghé chiël giü par la Vota Granda, e l'è fassi mal dabun! L'è piantassi al martel ant al cü... e l'è cantà na cansun! (...e s'ei pensà "grazia ricevuta" dièlu mia a nün!)



Ma dèss d'la panicchia ag uenta parlé ancò antant che al tumatìche ga dan al culò ross cumé al Natal (i vëgghi i divu Dinà)... Indovina-indovinello: chi ca l'è culla fumbra là ch'al vintott ad disèmbri la féva al presepio an cà? La midemma la neva tò al cigulle d'i fiör ad noch e cun la terra gelà!... Ag uenta di ca l'è ad bun cör ma l'è anca begn stralünà!



Antant i öimi dal Carlavé i dan na man al cöc i taccu sù al caudéri ben lustrai i tiru riva la verdüra, i pissu al föc e cun la sà i vardu da mia fé stüpidai!... As pò mia mütnu cumé salé la strà, Santì custa: vün gaveva fiocca cumé an danà, tant ch'i pansevu ca lu feva par lavò, par la comunità, parché dal Basalèi al Teatro l'è an bel tòcc!... ...anveci l'era pardü al ciaiv, al fabiöcc!... in truvaje i visín, davanti la porta da cà!)




Anca la cigulla la va 'nt la panicchia e la fa piangi i öggi a la Ravicchia, ma nu gh'è vün che dinti l'öggiu l'è chiapassi al ciupun a la cena per i settant'agn dal Carlavé!... Suma duvri la butta par festegghié e anveci dal "cin-cin" l'è partí an bestemmian!

Pöi as mütt la versa, regina 'd l'ört, e vardemmi mia da stört sa va cunti da cul pastò ca nu fa d'ogni culò. L'è nasnu a Guardabusun a manghié al panatun antant che 'l cravi i gh'evu da fé: bun par chiel chi passevu da là a péi tréi bocchia ca ga pias al misté e in pansagghi lör a fé nassi i cravéi!



Na quai gamba ad sélru ga sta begn, ma ag guenta druelu cumé al vin, cun moderasiun! anveci vün di nöst l'è bavü cumé 'n liun parché al festi chiël ga ten, A la festa a l'Argnaccia, st'istà, a l'ora da ne a durmì l'era begn rangià: L'è chiapà al santé sansa sté lì a vardé e l'è truvassi a la Ciümma anveci che al Giavini! ...Ma que ca 't cumbini?..



Mà ant la panicchia as po' maschié patati e carottule ansemma, e mà lí ninti a po' capitè! Ma se om e fumbra in già manghià la grèmma pöi i van mariesi sansa spicchié l'alföra! A l'è mia na robba nova, quand dói is volu bèn, e, anca na vòta, quènt settimìn in gnüi fòra ch'in scampai, begn gross e séign? E pöi nu gh'è ancò che, l'an passà, in nài an ghiësa cun al pittu ch'al cammineva già: dal rest "moltiplicatevi" l'è dilu al Signór e cui lì in purtassi avanti, cun tüt al cör!




I mancu mia i fasöi: cumé in boign! ..e i mancu gnanca i vulpoign che, par fé i paléit 'd la fiocca riva al strai i davoru tübbi ad plastica da elettricisti, matai! tant al cumün nu furniss: nu gh'è là!.. basta fénu na brachià! I rischü mia da né giü par la riva, cust l'è véi: frassu e culòra vattu ti a tajéi!



Vègn l'ora dà givé la pàsta e müllé mia: la bruànda bujènta l'è quasi furnia, parché tütti i robbi i gh'an da furnì, i lu san tüch, l'è gnanca da dí... E chissà se a Pasqua i saran brüsà l'avèi dal bar an piassa, ca ier l'era anco là? E sora la banca ad préja (pina ad bataria), magari puria satesi quadün a bevi la birrèta in allegria, sansa degghi la benedisiun a la bella scalinà, ca l'è tütta impataccà!



Quand la panicchia l'è coccia a misdi tüch i pussu par gni tacà al caudrun cumé i cristiegn a la cumuniun. Tüch la von spèssa e tüch i g'han quaicòs da dí ma pöi scappu via an pressa cun al sò minestrin, che a la fin l'è sempri bun! Par cumpagné al disné i Raviccioin i dan anca i salamin, al pan, la carn, i aranci, al vin e na tumma bóna cun pitti öggi, perché s'a fussa pina ad böggi sarìa "Grivéra"... o "stra d'i Tech"! Si gh'an da passé cui 'd la Lumen addio suspensioign (e al bacàn al chiappa di bei supatoign!).



I salamin in sempri na buntà e al fumbri ga pias la "qualità", ma i nöst Raviccioin, que chi gh'han, chi restu sempri cun i salamin an man? Perché al matalètte dal pais ga piàs mia da fé la Raviccia e la Damigella a Carlavé?.. Tüch i agn l'è an problema e n'agunía, e st'an vüna da s'la Riva suma duvü chiamé. As duvria fé la gara par fé le regine ai balli: qui a smia ancò ca ti ga rumpi 'l balli!




Al pan al cumpagna tüt ga pias ai bei e anca ai brüit e ga pias anca al can ca l'è purtà via al micchi dal disné ai müradòichi eru dré a lauré! Sansa sbursighé i animalisti as po' dighi "porcu càn"? ...e l'era anca la giornà che chi ch'al vend al pan l'era sarà!



Ancöj primma dal café cun i aranci as finis da manghié. E cun an suris l'è furnia na questiu: quand l'è gnü al Mattarella a Varà al nost sindic l'è presantassi là e l'è fach pas cun al Brambillun: in basassi cumé dói piviùn!



Lassèmi ancò parlé dal vin che a Campartögn al manca mai parché suma begn costümai; anveci, all'adunata ad Asti, ai pòvri alpin l'è nagghi pòc chi ga dessu l'ava, matai! A Campartögn as cimpa in allegria e se dal vóti vin nu gh'è mia stevu tranquil: pöi al riva... n'ora dop, magari, cumé a san Peru al Quari!



La panicchia da Campartögn, par me cünt l'è la pussè bóna dal munt! Vardévi da manghiela ben cauda e an cumpagnia e demi da menti: chiappev'la mia!....